

玉笥集

二二二

柳田文庫  
文庫11  
D 206  
1





010190556080



文麻11  
D 206  
/

玉笥集

玉笥集



原序

予嘗於岳武穆王精忠錄閱先輩張忠廉所作詩歌其  
辭氣抑揚感激所以爲王自處而表其忠烈者曲盡無  
遺意其爲人必慷慨瓌特以忠義自許非可以一詩人  
目之也惜未觀其全集以究其蘊迺者常山丞前侍御  
黃君玉輝發其尊府僉憲嘿菴先生所藏思廉玉笥集  
一帙將繡梓以傳託同年僉憲高公汝賢屬予序因得  
遍閱之其詠史非徒詳其事實且寓褒貶鑒戒之意其  
琴操樂府五言及近體諸作通暢俊爽森嚴壯麗如入





羣玉之府琳琅琕瑤粲然照目如閱武庫之兵戈矛及戟雜然陳列誠非苟作者於是益重其人焉蓋思廉當元季擾攘之秋嘗仕爲帥府參謀與僚案議不合罷去志不獲伸才不克售傷時感物而洩其悲憤於詩者如是使其生當熙皞之世所以咏歌泰平之化當何如哉嗟乎聖人刪詩三百篇其美其刺存乎勸戒下至楚騷比物興言雖過乎怨其感人亦至矣漢魏而唐作者不一獨杜子美之詩謂之詩史以其忠君愛國之誠懇也思廉其殆欲追逐古作者與者其所交若鐵崖楊君伯

兩張君輩皆一時能言之士其所得固有自哉夫詩運於精神心術之微勤一世以盡心而不得以詩鳴者多矣間有鳴者不幸不見收錄於賢人君子往往湮沒無聞者何可勝數獨思廉之詩晦於前而顯於今吾又幸其有遭乎僉憲先生昔以邃學宿德提學於吾江右造就士類甚衆玉輝能世其業立朝佐邑皆有聲茲又承其先志不没人善以嘉惠後學可謂濟美者矣故爲序之不辭思廉名憲會稽山陰人其居有玉笥山自號玉笥山人因以名其集云成化五年春三月旣望賜進士



出身中憲大夫浙江等處提刑按察司副使奉勅提督  
學校安成劉鈺序



玉笥集卷一

詠史

黃金臺

元 張憲 撰

黃金臺高且堅。三十六層凌紫烟。上不貯妓女。下不列  
管絃。鳳簫鸞曲匪求偶。銅盤露掌非希仙。高城不築太  
師塢。黃屋肯飾吳王椽。但欲強兵富國來英賢。上雪父  
母仇。下洗黎庶冤。黃金萬斤光燭天。曰鄒曰劇相後先。  
樂生往兮重燕權。燕鼎復兮齊鼎遷。變雌冀兮為雄燕。



玉簪集卷一  
鳴呼火牛觸燕師，  
樂生去兮燕土蹙。  
黃金臺荒狐兔伏，  
昭王地下精靈哭。

屠隱行

聶屠隱軹井里，  
朱屠隱大梁市。  
軹井七首尺有咫，  
白日殺人報知己。  
梁市金椎四十斤，  
挾趙功成耀青史。  
兩屠義勇勇不同，  
金椎七首分雌雄。  
丈夫一死泰山重，  
七首胡爲成小用。  
丈夫一死鴻毛輕，  
聶屠之死不若朱屠生。

荆卿嘆

白虹貫赤日，  
易水生淒風。  
燕人盡悲憤，  
相送冀城中。  
筑聲何慘慼，  
歌意哀無窮。  
豈不念卽往，  
立堪羸政曾。  
徘徊有所待，  
匪畏秦帝雄。  
自恨劍術疎，  
未易了君事。  
秣馬膏吾車，  
我客久不至。  
奈何遽相促，  
苦未知人意。  
丈夫重然諾，  
斷臂死不辭。  
但憐樊將軍，  
九泉終見疑。  
咄彼死灰兒，  
曷足同等夷。

安期生

吾聞安期生，  
賣藥阜亭東。  
時人不識其始末，  
見者但呼千歲翁。  
嗟嗟秦皇帝，  
仗劍掃六合。  
富貴亦已極，  
猶欲事吐納。  
琅琊臺上三月留，  
三晝三夜語不休。  
黃金白璧賜



玉簪集卷一  
三  
千萬阜亭棄置無人收。空留赤玉鳥報以後會期蓬萊  
渺茫不知處。童男卯女無歸時。鮑魚風腥不忍嗅。金棺  
玉匣萬古埋。僵屍悲無窮。可奈何。豈如安期者。海上騎  
青驪。黃金化丹砂。赤棗大如瓜。遨遊宇宙間。天地以爲  
家。

勝廣

秦帝掃關東。六王家業空。典墳俱燬滅。兵器盡銷鎔。勝  
廣起田畝。一呼天下同。雖然不成事。亦足號英雄。

秦鹿行

望夷宮中養秦鹿。百二山河春草綠。穿花尙作呦呦鳴。  
甯識外人須爾肉。李斯父子牽黃犬。上蔡東門志何淺。  
血污雲陽腰。領紅狡兔縱肥能幾鬪。闔高貌軟心跡露。  
稱馬獻君君不悟。羣臣相視莫敢非。只恐出言丞相怒。  
丞相怒秦祚移。函谷不守秦鹿馳。高材疾足爭逐之。項  
王叱咤起烏騅。日千里逐之不得不。肯止人疲馬困烏  
江死。沛公隱芒碭。手劔三尺長。網羅一舉圍咸陽。扼其  
角。剗其腸。食肉寢皮。傳後王。秦鹿死走狗烹。後人不用  
悲韓彭。帝王神器匪力爭。炎炎火德多洪福。前有高皇



後文叔回首平靈莽卓生漢業亦同蕉下鹿

滄海君

漸離筑中鉛作水荆卿臂落圖窮匕鮑魚風起鸞車腥  
不待明年祖龍死赤帝子滄海君劍三尺椎百斤千金  
胡爲輕報秦英雄不進圯橋履亦作秦皇刀下鬼

鴻門會

雲成龍氣成虎椎鼓撞鐘宴真主披帷壯士髮指冠側  
盾當筵請公舞白髮老臣心獨苦玉玦三看君不語五  
星東井夜聯珠天狗櫓槍落如雨鴻溝咫尺接鴻門干

里神騅一夜奔君不見龍泉影裏重瞳瞽玉斗聲中五  
體分

垓下歌

力拔山兮舉世稱雄頭指諸侯兮孰與君王一戰不遂  
兮胡爲自傷江東雖小兮勝負何常努力君王兮亟渡  
江賤妾請死兮先就劍芒

淮陰侯

勇畧震人主奇功蓋天下持此求合終全身古來寡淮  
陰將之傑用智如炙輠不忍衣食恩甘爲轅下馬重兵



玉簪集卷一  
四  
在掌握茅土復求假不悟齊巫言終然三族赭跳梁駒  
要駕覆鍾金躍冶既匪跋扈雄大權宜蚤捨忠逆無定  
見身敗慘裂瓦所以赤松遊浮榮真土苴

旦春詞

子爲王母爲囚赭我衣髡我頭終日春兮不死不得休  
東望邯鄲兮漳水流使誰報汝兮終無由憶君王兮解  
安劉不能遠慮兮爲妾謀彼四老兮君何求

朱虛侯行酒歌

長樂宮中女天子盛設賓筵懽戚里百官侍坐莫敢違

諸呂喧闐笑聲起御史中丞不糾儀叔孫制作成虛禮  
朱虛奉勅起行觴手提三尺昆吾鋼田歌聲振野鷄伏  
頸血光寒漢道昌

悲吳王

悲吳王悲吳王後此五十年亂起東南方天下旣一家  
骨肉毋自傷胡爲鑄金幣聚餼糧招亡命修甲兵几杖  
不復朝西京博局之恨竟不置反相之語奚獨忘悲吾  
王白髮種種心何長旣不能入武關扼咸陽又不能據  
武庫食敖倉淹纏梁楚真自敗縱死東越非天亡君不



見下密老人首生角哀哉七王何不覺

廣川王愁莫愁曲

愁莫愁死卽休鉛灌口刀灼眸托灰煮屍劍擊頭愁莫  
愁永巷春深作繫囚愁莫愁老嫗哭使者來窮詔獄徒  
上庸伏顯戮雪我無辜人十六

賣卜翁

三月長安道雨過街樹綠下有賣卜翁危坐營握粟舉  
口講仁義旋式推禍福不學賈大夫憂來方賦鵬

巫蠱使

禪襪步搖冠曲裾紗縠衣偉哉燕趙士借問此爲誰謁  
帝登大堂利口興禍階能令親父子恩愛一朝乖血濺  
長安城屍橫泉鳩里雖族佞臣家不益儲君死望思思  
不歸至今天下悲請聽三老議兒罪只當笞

董君行

長安三月春如畫賣珠兒騎公主馬青年十九桃花顏  
挾彈垂鞭花影下蟬翼輕盈垂鬢旁傳鞞綠幘紅絲韁  
黃金百斤壽上客彩段千端貽後房長門園作行宮立  
董君貴寵傾堂邑掖庭撥賜買筵錢御駕親臨百官集



王晉集卷一  
煮豹屠麟考鼓鐘宰人蔽膝如花紅東廂未下膳夫拜  
南面先傳謁主翁主翁極尊榮上殿不呼名北宮夜鬪  
狗平樂晝調鷹入侍帝姑寢出從人主行生同歡樂死  
同塋君不見三斬罪名加弄子陛戟先生幾欲死

霍將軍

熒惑守心星鴟鴞叫庭樹車騎聲憑陵夢寐來相捕赫  
赫奕奕豪君觸君王怒孱子不早誅悍妻尤可惡禍萌  
在驂乘惡貫起投附茂陵休上書徒薪非不悟何事麒  
麟樓猶圖博陸侯

月支王頭杯歌

朔風凍合諾真水東方寒日曛曩起白馬初腥徑路刀  
一尺留犁攬金七穹廬側坐呼韓邪谷蠡撫掌賢王歌  
割牲飲血定約束酒器高擎天驕窩頂平額深如白玉  
月窟日庭糟透骨刃痕截斷伏犀根疑是晉陽劊智伯  
金蓮鑿落玻璃盃銀稜闔葉車渠魁葡萄未捫小馬潼  
桃花先染真珠醅老上單于遺手澤誰問戎王包馬革  
藁街不鏤郅支頭將謂漢家輕首馘陳湯血戰未封侯  
張猛韓昌何足責

三石齋集卷一  
粵雅堂叢書



上元夫人詞

七月七日夜王母降漢宮上元何夫人儀衛畧與同頭  
 作三角髻年可二十餘身著青霜袍坐擁紫霞車九雲  
 夜光冠六山火玉佩斂袂登殿堦進向王母拜王母坐  
 止之呼與共良會翩翩三青鳥飛來綠窗歇口銜七蟠  
 桃甘脆勝冰雪劉郎非仙器內慾未斷絕懷核欲種之  
 開花待桃結一桃九千年徒爾糜歲月上仙啞然笑忽  
 逐綵雲滅

托孤行

河間有異女其氣上成雲望氣往求之乃得拳夫人夫  
 人雙握固見帝即披伸生子鉤弋宮立名堯母門一朝  
 忽被譴割愛非無恩子少母且壯亂階人所聞君王顧  
 大計牽去不容存拓跋踵遺範胡姬埋禍根司馬受寄  
 托弱兒終被吞乃知宣室畫僅有霍將軍

燕燕吟

燕燕在昭陽昭陽勝未央黃金塗地限白玉護椒房燕  
 燕情無已專寵恩無比啄死漢皇孫占斷張公子名放富平  
 侯哀哀許美人戚戚曹宮使綠綈方底赫蹏書赫蹏薄小紙也



王道好還須記取

折檻行

師傅不言事國柄歸五侯賢哉槐里令抗疏謁宸旒願  
請上方劍先斷佞臣頭狂直不畏死甘心地下遊大呼  
攀殿檻壯氣驚千秋御史將雲去將軍拜不休君王意  
亦解折檻不容修表表直臣節漢廷無與儔

東門行

東都門外今古稀東宮二傅同日歸百官祖道設供帳  
勅賜黃金作酒貲歸來日日會親友盡賣賜金買醇酒

白頭剛傅

蕭望之也

空勞勞一杯鳩羽不就獄博得君王祠

少牢

董舍人

董賢哀帝寵之

蓮箭銅壺催日晷舍人走報天顏喜日驂鸞駕共祠憑  
夜直龍牀同卧起雙闕累思立冢塋洞房重殿營軒楹  
珠襦玉匣賜祕器錦闌綈檻塗丹青金翦落衣龍袖斷  
黃腸剗柏御棺成合門貴寵專天眷內筵屢上麒麟殿  
元舅徒爭城邑封天子已師堯舜禪古來喪邦由女色  
籍閱韓鄧多男德司馬何爲位獨尊曼柔便辟能傾國



王恭嘗為子求白髮大師躬拜塵孔病免中郎堅避姻中郎望之子

恭嘗為子求嬴屍未入園扉裏漢業潛移王巨君巨君王賀

帝后

聖女謠

陰為陽雄天道否元城郭東君莫語繡衣御史活千人

賀王火土相乘生聖女六百四十又五年漢家大業歸齊

田夢中誰報滿輪月尤物禍人天使然翁孺諸子多女

德丙殿目成意相得畫堂良夜太孫生兄弟五人俱食

邑日月無光黃霧昏諫書終莫奪天恩兵權國柄遞相

襲四世母儀培禍根黃耆龍鍾容色槁銅壁鬼符夸壽

考黑貂徒守舊家風太后令官屬白玉已虧傳國寶君

不見持詔籌行藁椒析關踰牆走不休君如不信西王

母試看門樞亦白頭

昆陽行

天囚行屍聚蜂螳新市平林健兒起白水真人應讖文

春陵子弟持弓矢切雲高冠爛錦袍朱旗白馬青龍刀

漢官威儀喜復見下視赤眉銅馬紛騰逃長驅宛鄧摧

枯葉夜火軍書連奏捷八千驍果獨鏖鋒誰道將軍平



日怯司徒司空雙將兵百里晴雷聲鼓聲長人壘尉不  
護壘四十萬人同日崩昆陽城濠水流血六十三家謀  
議拙象犀瞋目虎豹蹲疾雨狂風天降孽司徒受首司  
空奔長安四面兵雲屯承明殿裏自避火敬法闈前誰  
斧門君不見昭鮪魚讀兵書漸臺勢促將何如天符金  
櫃不復驗哆口蹙頤終就誅紺約之衣虞舜七按圖旋  
席猶逃死七珠斗柄不掩身劉秀明年作天子

井底蛙

公孫述

清水令井底蛙鸞旗旄騎稱警蹕垂旒佩玉登龍車不

知天下本一家雌雄未決胡矜夸井底蛙井中小堂堂  
東帝天日表南廡岸幘彼何心都布單衣笑君狡君不  
見故人共卧嚴子陵一夜客星侵帝星何嘗解作木偶  
形

強項令

董宣

夏門亭東數公主格殺蒼頭如殺螳一言回天天亦喜  
縱奴殺人何以理擊頭流血臣所甘俯首頓地臣所恥  
賜錢三十萬分須不私已強項縣令今豈無不遇明君  
空篋死



跋扈

梁冀

乘氏忠侯骸未冷。癡兒遽起專宮省。使者彈章十五條。極惡猶遣進湯餅。夏門亭外迎鸞車。常侍私謀定蠡吾。冤刑誰復掾李杜。公議徒然唾趙胡。將軍權勢迷天日。天富淫人天益疾。白鵠書生獻佞詞。絳帳名儒纔掌筆。長史忠言若不聞。故吏諫書何足云。佩刀夜落議郎省。日食明誅言事臣。埤幘獄冠異巾服。彈碁挽滿俱精熟。兔園羽蓋鼓吹喧。喚起花奴陪蹋踘。連房奧室相對街。飄飄雲氣如蓬萊。黃金白玉充藏室。門外車聲聒旱雷。

土山千里九折坂。臂鷹走馬歸來晚。誰盜千金十斛珠。坐使良民喪貲產。守藏婢監宅奴。奴何幸婢何辜。羽林奪劍不論罪。歲餘又贖張尙書。口吟舌剩積惡豺。目鳶肩不追誅。君不見墮馬髻折腰步愁眉。一旦溼啼粧。蓋世榮華逐飛絮。七君三后六貴人。將校尹卿同日仆。家財三十萬萬充王府。爲謝皇家戚里賢。勿效將軍懷跋扈。

黨錮獄

漢桓帝延熹九年  
殺成瑨等并黨人

黃門貂璫。乃專殺生。內幹心膂。外典政刑。樹立饗餐。傾



陷忠貞。牢修一紙。四海俱驚。使者四出。逮捕縱橫。囊頭  
五木。拷掠笞榜。詔獄慘酷。有冤誰聲。賢哉賈長。奮袂西  
行。網羅解張。大禍底甯。云胡諸公。既哲且明。不晦其光。  
尚貪美名。卒蹈大戾。自殞厥生。乃有君子。龍蛇潛伏。匪  
惠匪夷。靡榮靡辱。不近軒冕。不罹桎梏。茂樹鬱盤。爰托  
我屋。

誅宦官

漢靈帝建甯元年太傅陳蕃等奏誅宦者曹節等不果俱被害

太白入房天示微。上相上公俱有眚。侍中已奏天官書。  
北寺獄詞猶上請。五官令史發奏章。姦謀夜召王與張。

尙書詔版出脅筆。一十七閹心計長。白頭老翁短才術。  
拔劍突門肆呼叱。門生官屬務相隨。誰解盡言箴八失。  
於乎太傅死將軍誅。洛陽都亭集血顛宗親。賓黨一日  
屠朝廷大柄歸闈奴。胡爲何國舅。中平元年何進誅宦官張讓等又不果被害  
不肯鑿前車。又向嘉德殿前伏。屬鏤誅宦官良可乎。

千里草謠

董卓

青青千里草。荒遍長安道。幡畫竿摩車。金花葢飛阜。天  
子任廢置。公卿聽呼召。生殺擅大權。劫弑甚羣盜。築塢  
高埒城。埋金動盈窖。司徒展祕謀。義子奉密詔。逆屍不



待燃臍炷自堪照。乃知董公力驅除。付姦操。

一栖謠

獻帝興平二年郭汜李傕劫帝入其營

一栖不兩雄。治兵日相攻。北營

李

劫萬乘。南岩

郭汜質三

公。祠鬼淫祠下。朝王葦箔中。上供牛骨臭。賜質馬錢空。

夜火焚行殿。妖氛貫紫宮。鳴錐驚輦轂。飛矢射簾櫳。天

子猶徒步。何人敢騎從。顛危策東澗。狼狽走新豐。皇極

灾頻煽。朝廷塵再蒙。誰能爲此禍。宣義是元功。

大礪謠

公孫瓚以此謠從鎮易積穀休兵以待天下之事後袁紹攻敗自焚死

燕南陲。趙北際。中不合。大如礪。惟此中。可避世。移易鎮。

築易京。廣積穀。多屯兵。閱世變。待時平。大柱折。隊道裂。

樓櫓傾。骸骨蒸。白馬義。從不自亡。誰爲劉虞洗冤血。

梁父吟

武侯成就關張勝晏子殺三士多矣故反其詞

伏龍隱南陽。高卧久未起。不肯渡長江。焉能涉漳水。炎

炎火絕卯金。刀巍巍土王。當塗高種瓜。兒子不力戰。織

履郎君無地逃。伏龍一起捍坤軸。雄據西南成鼎足。十

年汗血戰元黃。五出王師爭九六。萬人之敵兩熊虎。百

戰辛勤事行伍。河南河北謾稱雄。不得袁曹一丸土。伏

龍纔起帝業新。千古君臣魚水親。遂使真龍全羽翼。風



雲成就二將軍

南飛鳥 曹操

南飛鳥尾畢連白頭啞啞將眾雛渭河西岸逐野馬 破

巾也白門東樓追赤兔 橋呂布也冀豚 袁熙荆犬 劉琮肉不飽展翼

南飛向江表江東林木多俊禽不許南枝三匝遶老鳥

莫侮髯郎小髯郎詎讓老鳥老東風一炬鳥尾焦不使

老鳥矜觜爪老鳥自謂足姦狡豈信江湖多鷺鳥掉鳥

頭啄鳥腦不容老鳥棲樹枝肯使蛟龍戲池沼 赤壁之戰釋

老鳥未肯搏紫髯大耳先相攫河東老羽雲外落 雲長死

老鳥巢成哺銅雀

合肥戰

當陽坂能以窮兵拒曹操逍遙津不能以合師抗張遼甯統諸將不及飛遠矣賦合

肥戰

合肥戰戰甚力盪寇將軍持銳戟 甘甯紫髯郎君馬飛空

孫權江表虎臣俱辟易君不見瞋目橫矛決死敵 張飛百萬

曹兵莫敢逼止啼之威未為特惜矣江東無益德

縛虎行

白門樓下兵合圍白門樓上伏虎威戟尖不掉丈二尾

袍花已脫斑斕衣掉虎腦截虎爪眼中視虎如貓小猛



田晉集卷一  
跳不越當塗高血吻空腥千里草養虎肉不飽虎饑能  
噬人縛虎繩不急繩寬虎無親座中叵信劉將軍先不  
縱猛虎食漢賊反殺猛虎生賊臣食原食卓何足嗔

獵許行 忠義

老髯古義勇望蓋取顏良況茲遊獵時獵操如獵獐桓  
桓劉將軍度量符高皇帝王討賊有大義豈與蛛蝥爭  
小智丈夫成敗皆聽天利鈍兵家乃常事髯郎勿用苦  
相尤飄飄江渚吾何憂

成子閣讖 諸葛恪

越椒滅若敖伯石喪羊舌生子縱多才禍福未可決藍

田產玉信佳兒剛戾自用誰能醫西朝大志不易繼西朝

蜀也恪乃諸葛亮姪東關小勝何足奇大臣未附主少

國疑呂侯有深戒一事須十思呂岱戒諸葛恪曰世方多難子每事必十思

豈宜履敵庭千里勞從師新城一剄不自合張特守新城恪攻將

陷特給之日明早送降恪從之歸來憤色將誰移虹繞

輿犬銜衣水腥血臭知不知獨不聞童謠云蘆葦單衣

筏落於何相求成子閣

費尙書 蜀費禕被魏中郎將郭循刺之



尚書秉國樞詎宜矜有餘縱不愛身須愛國富兒尚保

千金軀來敏基魏曹爽寇漢中勅禕救之來敏詣禕別求圍基禕無倦色敏因曰公必能辦賊

張疑書疑嘗致書於禕引岑彭來歙為戒欲禕防循禕不從故被害嗟哉二子多良

圖尚書何不置之左右隅西平之子何足誅

夕陽亭晉裴楷惡賈充薦充督秦涼諸軍充問計于荀勗曰辭之實難獨結婚太子可不辭而自留矣充妻遂賂楊后左

右納其女成風果畱不遣

百官供帳紛營營夕陽亭西誰遠行充閭之子專閭鉞

伏節萬里西南征結婚一語聾天耳既鑿凶門行復止

衛家五美空善評姦謀仍落三豎子君不見魯公怒攝

項城軍殘喘聊延衛府勲枯木劍鋒金屑酒天刑猶脫廣成君

玩鞭亭晉王敦在姑熟明帝出看敦營敦夢覺逐帝帝以馬鞭與老姥及追者至問姥玩鞭

帝遂去追不及

飢烏壓營營作聲紅光紫電圍金鉦黃鬚小龍馬上笑

白首饑豺夢裏驚老奴怒擲珊瑚枕追兵起合琉璃井

巴馬東歸疾似風道傍遺糞如冰冷健兒空玩七寶鞭

荆臺老姥功誰傳

孟參軍孟嘉



孟嘉盛德士而有敏贍才觀其言動間正順不可階雖云善酣飲亦不傷雅懷以此得聲譽何必狂與乖

五湖長

桓元後僭號楚被都護馮遷斬於枚回洲傳首梟于大桁

父為九州伯兒作五湖長父子共一轍相繼猶影響老奴首領幸爾全豎子凶逆那可言流芳本不願百世遺臭竟能傳萬年五湖長晉之賊總百揆稱相國封十郡加九錫坐南面以負辰竊神器而改厯司徒奉璽綬萬乘讓宸極永始建新元偽楚承金德百官勸進稱聖明龍牀后土為之傾草間英雄興甲兵龍行虎步見者驚

天言欲俟關河平行宮起居注未成義兵已破潯陽城漢中遁舟胡可到同州短刃遙相迎楚王楚帝幾日榮血顛模糊梟大桁

舉几行

南宋劉太子劾弒其父義隆兵入含章殿義隆舉几捍之五指皆落

含章殿前五像毀畫輪車發宮門起逆刃鏗鏘五指紅衛兵夢醒烏皮几五州屯將不舉兵無復人間有人理裁弟事易裁兒難謀及婦人何足歎江芋漏言宮甲起

楚太子商臣弒其父靈王

君王不記請熊蹯

寇天師



天師元是嵩山生。挺身起繼張道陵。嵩高山頭遇老子。親手自傳圖籙經。北方真君開太平。天師亦出臣朝廷。平生不好莊老書。當時只賢崔司徒。奈何獨執弟子禮。膜拜甘作天師奴。上元靈命不可孤。牲牢玉帛走道途。重壇五層凌紫虛。日中會設千人廚。顯揚新法終何如。君不見司徒不救。謗國誅真人。亦罹凶刃屠。平城道場成茂區。天宮靜輪何可誣。

高令公

允魏高允為人內文明外柔順崔浩嘗譏其乏矯矯風節及浩得罪聲嘶股栗不能言元申釋是非辭氣清辨其矯矯者勝浩多矣嗚呼人固難以外貌識也必歷患難而後見予疾夫今

之外以玉馬自銜而中實不然者賦令公辭以傷之焉

珉珎矯矯玉以璞兮駑駘矯矯驥踧踏兮其終也璞者以琢矯矯碌碌兮又其甚也踧者以服矯矯齧齧兮嗟人固不易知兮非朝夕可能窺也事固不可辨兮必悠久而後見也嗟乎渤海芄芃兮高公已而去者莫追兮來者其誰

魏孝靜別六宮歌

宮皆哭

齊高洋逼帝禪位帝曰推挹已久謹當避遜求入與六宮別舉

獻生不辰兮身播國移永作虞賓兮命不復來弊履遺



簪兮古人所思況茲六宮兮豈一嬪與妃玉體其可愛  
兮黃髮又奚可期出雲龍門以悵望兮固十步而九回  
彼永言以見貽兮淚浪浪其為誰

梁簡文飲酒歌 侯景弑簡文以絕眾望使王偉等  
進酒簡文知其將殺已盡醉而寢

偉進土囊  
壓殺之

龍為魚兮宗社移位既禪兮公復何疑此酒可盡兮飲  
不辭却手琶兮推手琵琶四絃嘈雜兮聲急調悲不圖為  
樂兮至於斯

龍光殿 梁湘東王繹繼立號世祖孝元帝一日嘗  
講老子於龍光殿魏于謹入江陵執之囚

於烏縵  
之下

赤氣干北斗太陰犯天王天道信可懲人事關興亡奈  
何龍光殿戎服講老子元談縱精緻不救烏縵恥介馬  
不習騎死矣獨目兒

胭脂井 陳後主

胭脂井瑪瑙鬚琉璃欄黃金轆轤銀縷寒桃花小波下  
無底雌龍古怨沈紅水妖姬不作井中鬼玉樹飛花落  
如雨

鳩酒來 隋煬帝



鳩酒來鳩酒不來白練來夜觀天象文帝座疑有災雍  
州破木不可作龍船萬里浮龍骸丹陽築宮事已晚流  
珠堂下凶門開佳城不受漆牀版臭土竟污吳公臺騎  
牛小兒空有意李密龍鍾老父徒與哀鳩酒來白練冷蕭  
娘不墮燕支井玉掌空摩長短脛三尺天戈全項領

玉笥集卷一

譚瑩玉生覆校

玉笥集卷二

元 張憲 撰

詠史

太子建成良馬駒行

昭陵六馬平羣雄良駒西來歸春宮春宮飽養叱肥膂  
豈識天策上將人中龍良駒猙猙善踶嚙不逐秦鹿空  
三蹶不學拳毛騮美良川下追金剛不學什伐赤虎牢  
關前擒夏王隨風逐電日千里百戰驟馳無與當青騅  
拔箭吻帶血黃驃突圍毛裏瘡玉驄露紫競神俊畫圖



想像猶龍驤西府真龍正宸極東宮華殿生荆棘昭陵  
風雨夜聞嘶六馬功成化爲石良駒老去空伏櫪

代魏徵田舍翁詞

并序

鐵崖楊先生以殺田舍翁爲文皇根心語蓋徵  
好直諫忤意者數矣是必有弗堪其直者故怒  
曰會須殺此田舍翁不覺其言之出口也此則  
是也然謂徵東宮臣節之虧故爲太宗所薄而  
呼爲田舍翁者此則非也始徵入關無所知名  
乃自請安集山東招徠李勣高祖授以洗馬與

王珪同僚東宮者官也非臣事建成也徵勸建  
成早除秦王者是徵盡其職非所以取憾於文  
皇也文皇亦不以是憾徵也建成死高祖命東  
宮齊府官屬盡聽秦王處分則徵安得獨背敕  
旨而死建成之難乎徵天子之臣非東宮私臣  
其事太宗不得謂之虧臣節也故太宗謂長孫  
無忌曰徵珪盡心所事故我用之長孫后亦曰  
妾亟聞陛下稱重魏徵不知其故觀此則知太  
宗決不薄徵決不薄徵而有田舍翁之語何也



蓋徵貌不逾中人而舉止疎慢則徵得名田舍其以此與雖然此語徵不知也徵知必有詞使太宗果殺田舍翁翁必乞一言而死決不緘口就戮也其以長孫后諫而意悅亦以后言惋而有理故曲從之然其殺徵之意未嘗不根於心也他日疑其黨侯杜怒其錄諫草而徵已死無所洩憤故停叔玉婚仆所撰碑也嗚呼徵幸而不在若在則恐不免爲忠臣矣夫盧祖尙死於朝堂張蘊古死於刑獄李君羨死於圖讖劉洎

張亮死於誣謗孰謂太宗不忍於殺徵也徵能入夢於太宗而不能自明其事故代田舍翁詞補徵諫錄云

臣本山東農臣誠田舍翁臣以隋末亂出仕蒲山公蒲山復諫自用故臣言不用臣計不從百萬糧一日盡百萬衆一夕空力屈事去歸山東臣義不忍棄故主事仇充相隨西安朝真龍先帝不臣識大臣不臣通故臣上書自請安山東山東歸皇圖授臣洗馬之職在東宮東宮多不德兄弟不相容臣教太子翦黑闥親元戎又教



太子除陛下太子不臣庸太子既死先帝命臣聽陛下處分臣安敢效匹夫小諒自與逆黨同陛下以臣盡心所事赦臣死罪除臣祕書登臣政府爵位崇臣於是感激時時進諫開皇衷陛下幸而時聽臣言以致四海太平年穀豐使陛下功德及堯舜則臣心喜小有過失則臣心冲是以不四年中而有三代風陛下初年誠心聽諫故天耳聰今聽諫不逮昔故天耳聾往以未治爲憂故人心悅今以既治爲安故威德隆往日用臣言賜臣以黃金饗天廡驄輟殿材構臣屋與墉今日以人言仆

臣墓碑停臣子婚爲惠胡不終喜臣則謂臣嫵媚惡臣則謂臣田舍翁陛下不宜以喜怒毀譽損厥躬臣薦侯與杜謂其才畧雄臣豈阿黨預知其終凶臣錄諫疏草前後三百封欲使後世知陛下能聽諫致時雍豈欲賣直歸過爲己功避嫌焚草徒足恭臣幸而身先朝露使臣不幸恐不免隨比干似龍逢獨不記臣言良與忠胡爲乎會須殺此田舍翁田舍翁豈畏死但惜陛下既殺張亮又誅劉洎翦刈大臣如刈蓬臣不願陛下祠少牢立仆石但願陛下養氣質除內訌毋以喜怒存諸胸大



臣無災帝德穹社稷無虞王業鴻千秋萬歲為唐宗老  
臣不諱田舍翁於乎老臣不諱田舍翁

槌馬詞

武氏之識太宗欲盡殺宮中疑似者而才人在側不疑也豈非蔽於色與武氏又能以柔言令色事帝帝故不疑之槌馬之言天誘其衷使之自露芒角千載之下使人聽其言猶凜凜有英雄氣其志必不減高歡也而帝不悟方且壯之呼何物女子如此勇健之語徒能發之於李君美甚矣聲色之蔽人也文皇且不免况雉奴之懦者乎

河東女兒年二九欲取鐵槌槌馬首雄心詎減賀六渾  
何事君王不驚俶獨不記女武主在宮中元機預泄李  
淳風淫心濫殺五娘子聲色蔽人無不聾

聖母神皇祠

東風未燥昭陵土感業尼稱天下母則唐室山河忽變  
周李氏兒郎更姓武洛水泱泱出寶圖黃金爛爛鑄天  
樞五王不入迎仙院二豎能忘受命符君不見漢家元  
后號文母廟食從來姪祀姑

匡復府

揚州都督開三府十萬強兵猛如虎駱生長檄魏生謀  
大義精忠照千古山東豪傑望旌旗蓄縮江淮立伯基  
莫指金陵圖王氣石梁鴉噪髑髏悲



三言集卷二  
三  
桑條韋

英英武媚娘競行新樂章  
洪音入周廟誰復歌堂堂  
若若桑條韋雅製勞奉常  
女妖重疊起兒婦繼姑嫜  
公主賣美官墨敕斜封長  
昭容持大秤榮辱隨低昂  
點籌煩玉指握槩穢椒房  
功臣不脫死天子亦罹殃  
潞州別駕不發憤神器遽能歸相王

机上肉

机上肉禍之胎幽求先見孰與並  
季昶獨斷真奇才去草不去根  
噬臍已無及十死鐵券不逃刑  
五部空王難久立君不見曳竹槎  
飲葛汁漢陽白髮老不歸瓊州碎  
骨人誰拾机上肉能幾宿尙記漢家夷  
產祿羽林大將蓄奇謀三尺短刀門外伏  
机上肉終自毒

玉真仙人詞

玉真何仙人唐帝之愛女願辭湯沐邑  
削號去公主頭戴九雲髻身著六銖衣  
甘居石竇洞不戀繡羅幃夜枕白雲宿  
朝乘紫電飛登天謁王母渡海尋江姝  
天鼓夜作響玉池晝生肌眼角有時方  
童顏當世稀乃知皇姑娣不是壽王妃



天寶詞

林甫官朝日韓休罷相時新臺初納婦興慶又生兒玉  
柵籠鸚鵡金盤進荔枝內前車馬亂無地避諸姨

雙廟詞

睢陽戰敗血飄杵力屈猶思爲厲鬼元元祠前哭一聲  
朝食愛姬暮羅鼠唐家宮殿秋草生二十一陵如掌平  
獨遺雙廟門前石日有行人來繫牲

神雞童

神雞童解鷄語青年十三動人主鷄坊小兒五百人指

揮進退皆由女雲華雕翠聳寶冠白繡羅襦耀金縷振  
木鐸麾玉塵率雙雄分兩旅導立羣鷄皆有序左雄巍  
冠滴紅藍右雄彩翩翩花羽短味磨鐵吻鋼鈎礪銅距  
怒頸刺蝟張老拳雙鷄舉強者昂藏弱者僂龍顏一笑  
爲君傾賜賚金繒多如雨劍尖跳竿頭舞弄丸兒走繩  
女教坊百伎皆色沮君不見千里東封隨軟輿父死歸  
葬天恩殊縣官具葬器役夫挽喪車乘傳洛陽道走馬  
長安衢奪情起復不暫置明年會駕驪山隅寵榮富貴  
世莫比何必宋宗勤讀書



大腹兒

麀巫夜禱輒犖山淫光下燭穹廬寒柳城小兒不敢睡  
四野惡聲啼狗肝猪龍怒磔老梟腹鱗甲粗疏頭角禿  
婪酣大肚三百斤偷得真龍半分福平盧寶刀未發礪  
范陽氈帳先潛形金鷄口吐東北赦青驪啼作西南聲  
鳳凰池荒金鏡破獬豸臺傾胡眼大東風野鹿嚼楊花  
白日妖狐登御座華清玉鬢湯作泉洗兒果撒黃金錢  
并刀翦綵十六幅錦棚壓碎宮娥肩象牀夜冷嬰兒哭  
猪龍爪破金訶玉香齧不痛荔枝漿雄心已飽鷄頭肉

長安天奪蜜口臣銅頭鬼鼓漁陽塵赤心一夜變胡腹  
二十四郡都無人潼關夜漏鷄聲早馬嵬坡下冰山倒  
劍門西寄杜鵑巢練帶玉環埋翠草嘉山土門勤戰功  
猪兒帳下屠猪龍旄頭星落大腹破机上鸞刀一尺紅

偃月堂

丞相總朝綱謀深偃月堂腹中有長劍不用夜遷牀

射塔謠

南八男兒忠義腸一死不負張睢陽救兵不出嚼指傷  
天翦射塔塔欲僵男兒姓名千古香柳碑自與長淮長



陳濤斜

陳濤斜四萬義兵焚牛車東青坂再戰南軍俱不返兩  
書生一琴客敗軍蠹政誰之責君不見閬州丹旄歸來  
晚魚飡預定龜茲板

白衣山人

李泌

白衣者山人黃衣者聖人聖人起作中興主山人出為  
謀畧臣王師尙未誅安史何事山人先納履學仙本不  
為長生且向牝鷄逃一死黃瓜臺下黃瓜稀黃衣復國  
青驪歸飛龍廢使交鎖鑰天下之事無可為白衣不復

入京國歸食衡陽三品食竿頭飽啖懶瓚殘留取遺謀  
匡代德

李五父

李輔國

靈武儲君奮潛邸飛龍小兒乘勢起大權世襲脫靴翁  
從此門生視天子閹佞職本黃門郎抵用收權生禍殃  
中宮狡計殺張后西內禁兵遷上皇李五父唐之悖天  
刑不正市曹誅半夜盜兒偷首骨門生不忍醜屍分賜  
葬恩酬定策勲

奴材

郭子儀嘗言吾家  
之子皆奴材也



天子龔家公將軍軟節度汾陽五福人莫如猶恨西平  
生阿愬令公能以功名終膏梁遺蔭生八雄幸有曜兒  
稱孝謹如晞如曖皆妄庸郭家子雖奴材都虞候戴頭  
來尙書留後轅門開尙書若斷老兵首郭家之子真奴  
材

藍面鬼 盧杞

藍面鬼內狡獪外愿慙人言鬼姦邪天子殊不覺藍面  
鬼肆讒毀二帝四王相次起矯情雖蔽中興君至論焉  
逃鬼谷子中書令公獨先知朔方節度由女死忠貞不

學先中丞血面能令魯公舐

新店民

新店民何不樂歲豐穀稔可作權吏格詔書恩不渥九  
重深下民賤咫尺天威情不展幸因田獵及芻蕘又不  
深謀思及遠太陽苦被浮雲遮何不謗木肺石開南牙  
廣恩沛澤被天下無事獨復光奇家

桐葉歎

涇卒生奇變狂奴夜犯宮渭橋頻力戰魯店冠元功御  
史情雖切先生志不同掌心桐葉破千古恨難窮



樊段歎

倒印召追兵拔笏擊賊首表表段司農忠壯古無有草  
冊復仰藥不如先斷手何事樊太常殺身且遺醜舍生  
固不易處死良獨難但看安不安偶因樊志喪愈覺段  
心丹

弔裴晉公

客散午橋莊人空綠野堂涼臺風罷扇燠館月侵牀慷  
慨平淮節淒涼別墅觴疇咨張國勢誰爲整王綱邁爽  
虛神觀堅貞折棟梁四朝全懿德五子繼恩光用舍關

輕重華夷仰聞望皇程纔睥睨牛李又跳踉鐫詆雖無  
害浮沈大可傷元和猶負謗寶慶固難量侃侃詞臣疏  
勤勤諫苑章聖心存眷顧天意幸聰明險矣非衣讖危  
哉第五岡腐儉鋒莫觸關子舌尤長元老雖云壽星圖  
競不昌可憐榮配享無復坐巖廊特旨探遺奏殊恩赦  
護喪營塋空有地晉祀已無益朋黨終軒輊藩臣竟頡  
頰惟遺身後傳功抗郭汾陽

柿林院

永貞天子開東邸書奕兩奴相表裏問安一語動天衷



從此大權皆入已牛家之女韋家郎女專誥命郎平章  
書奕兩奴雙翼長書奴弄筆翰林院奕奴索飯中書堂  
可憐八司馬一例投南荒惜乎監國不早起奕奴明年  
方賜死

甘露行

甘露夜降金吾廳石榴枝上明珠明金吾將軍祥瑞奏  
神策中尉恟疑生壁衣風吹機不祕赤梃兒郎眼中真  
金輿決破紫翠愚丞相綠衫借堂吏闖屍未臭鳳鳴山  
節度頭落葉盤間天殺二凶天假手相公不必咎王璠

封刀行

永平殿下飛金仙洛陽白馬遍中原臺城飢鬼死不悟  
武德沙汰成徒然會昌君相兩英傑大索逃丁出空穴  
精藍四萬盡歸官天下僧尼俱長髮盧龍節度封寶刀  
不爲困藪容逋逃郎中淺見不足錄大中天子真痴叔  
妄生更改復浮屠不記長安窟室通李吳

餞梁王

壽春殿延喜樓梁王欲歸天子留樓前百戲排倡優百  
官陪宴酬未休梁王上馬樓上頭梁王東歸天子愁天



子愁梁王喜鴟梟暗移傳國璽碭山王氣瓏琤起皇后  
捧金卮天子歌柳枝家亡國破無多時讀此不覺涕泗  
橫流恨不剗刃  
賊臣以  
快其心河東鴉兒獨眼窺紇干凍雀死不飛灞橋送客  
那得知

王鐵鎗

朱晃帝中國人皆盜賊之沙陀起竝世勢力相扶持血  
戰長河間六年筋力疲兵威日益弱國勢日益痿懦將  
外召侮奸臣內生欺將軍食其祿報主死不辭願以一  
鎗勇往濟社稷危慵慨吐雄畧發憤親戎師夜火焚河

梁敵人俱紛披南城竟不守果速稱神奇藐視太原孽  
聲聲呼小兒良猷未及展庸君先見疑左右盡側目逐  
之惟恐遲竟奪虎熊旅付彼河上癡卒界保鑾隊殉君  
忠壯屍丈夫頭可斷豹死固留皮雖曰置身錯大節終  
不隳蕭條滑州寺遺像父老思禍亂五十年置君如奕  
碁爲臣死國難此義無人知五朝八易姓主死臣不悲  
不意武夫中有臣能若斯豈無長樂老爵位榮一時縱  
保兔園冊至今天下嗤

李天下



沙陀一夜鴉兒死夾寨堤邊黃霧起三枝誓箭挂馬鞍  
誓與先王刷遺恥六年河上幾辛苦纔得河南一丸土  
盧龍悖子雖剖心耶律羶夷猶未虜櫛風沐雨壯志荒  
傳粉塗朱樂未央癩梟本爲太原孽驕子都化邯鄲倡  
歌吳歛習趙舞吹玉笙擊花鼓十萬貔貅介冑雄三千  
粉黛烟花主呼優名李天下龍頰輕批面如赭法刀不  
斬敬新磨鏡破銅光解如瓦魏州總管著柘黃門高流  
矢生金瘡劉尼不進銀瓶醴鳳瑟龍箏殉龍體君不見  
鐵鎗將軍有先知鬪鷄咬犬呼小兒

金牀兔

兔子上金牀閉門作天子日從日上生意促明年死大  
鳥名鸞鷲四目而三足聲聲呼羅平羅平赤公族碧楮  
降朱文赤光耀金虺本圖南越榮翻作西江鬼順天者  
昌逆天亡南金越綾從多藏八都副使拜尙父四世相  
承吳越王羅平髑髏悲血光

申伶兒

黃金鍾真珠酒弟飲此分千歲壽真珠酒黃金鍾兄分  
飲今壽當與弟同兄不飲兮弟愈恭兄色變弟心疑弟



王晉集卷二  
不追兮兄無辭申伶兒起合雙金卮一飲漬腦死莫醫  
死莫醫置不知願全紫荆樹莫忘棠棣詩

陳橋行

唐宮夜祝邈佶烈憂民一念通天闕帝星下射甲馬營  
紫霧紅光掩明月殿前點檢作天子方頤大口空誅死  
重光相盪兩金烏十幅黃旗上龍體中書相公掌穿爪  
不死不忍祕鴻寶畫瓠學士獨先幾禪授雄文袖中草  
君不見五十三年血載塗五家八姓相吞屠陳橋亂卒  
不擁馬撫掌先生肯墜驢

金櫃書

約誓書金櫃藏不鑿柴家幼兒祚不長弟兄子姪相繼  
作書記署名傳晉王金櫃書藏禍府肘腋奇凶起慈母  
深宮燭影夜無人漏下嚴更天四鼓寡婦孤兒不敢啼  
戮地有聲金柱斧太平天子著龍衣定策元勳不敢非  
藝祖有靈君莫急朱牌金字火羊飛

澶淵行

鐵馬遼軍飲河水三關要地平如砥諸城閉壘百僚驚  
西幸東巡議蠶起相公峙立不動搖忠肝義膽凌雲霄



親征雄謀出獨斷孤注一擲先得臬澶淵城上黃旗入  
萬歲聲中河水立神弧半夜發牀機天殺蕃酋蕃母泣  
蕃兒進退兩成禽可惜君王不追襲不追襲失天賜銀  
幣年年勞奉使冠履從茲顛倒置君不見主和至尊多  
善柔懶將一矢射岐溝歲輸二十萬匹絹不博遼兵一  
顆頭

瑤華后 郭氏

君不見明道時美人爭寵皇后危外廷議起呂丞相內  
殿覺結閹都知爪痕龍頰有實迹賜號猶得稱仙師美

人之寵尋亦衰又不見紹聖中婕妤凌后禮不恭用事  
擠挑郝內侍順旨迎合章相公安興魘魅卒無驗詔獄  
慘酷冤血紅婕妤正位名號崇瑤華兩后轍迹同郭后  
不歸孟后生還宮天刑不殺侍醫賊地下仁皇愧哲宗

哀熙甯

熙甯天子仁如堯熙甯相臣奸如梟 王荆公 心管商口夔  
臬朝保甲兮暮青苗三司條例紛牛毛祖宗制度皆動  
搖百年流毒毒不消於乎仁皇有意安天下悔不十年  
相司馬南方聖人真土苴



王晉集卷二  
紹述謠

紹述復紹述賢才一時出壞盡祖宗基遂得奸臣術

悲靖康

悲靖康一主戰百議和括金銀搜馬騾不將一矢射勁  
敵奉使往來如走梭青城車駕不復返玉緝金支皆渡  
河君不見幸使橋口六馬原鈔本當有脫誤呼二酋話香火

一綱謠 李綱

一綱舉萬目張建炎帝開重光首竄賣國牙繼誅易姓  
王募軍買馬事戰備誓爲吾君復舊疆忤汪黃七十五

日中書堂奉祠已落張公章沒嗟乎一綱去萬目弛敵  
馬長驅飲江水張公督戰方未已

岳鄂王歌

君不見南薰門鐵爐步神矛丈八舞長蛇雙練銀光如  
雨注又不見鐵浮屠拐子馬斫鏑鋼刀飛白霜貫陣背  
嵬紛解瓦義旗所指人不驚王師到處壺漿迎兩河忠  
義望風附襄鄧荆湖唾手甯朱仙鎮上馬如虎百戰經  
營心獨苦賜環竟壞迴天功捲旆歸來卧樞府錢塘宮  
殿春風輕嬌兒安晏醉未醒徒令功臣三十六舞女歌



兒樂太平虎頭將軍面如鐵義膽忠肝向誰說只將和  
議兩封書往拭先皇目中血將軍將軍通軍術君命不  
受未為失大夫出疆事從權鐵馬長驅功可必功成解  
甲面赤墀拜表謝罪死不遲惜哉忠義重山岳智不及  
此良可悲嗚呼肆讒言加毒手申王心循王口斬王湖  
上乘驢走五國城頭帝鬼啼殷勤相酌平安酒

悲建紹

張都督殺曲端關中斷右腕中興天子無相干秦丞相  
陷岳飛江左長城墮中興天子知不知鐵象馬精忠旗

羅索望風走烏珠搵淚歸旗折馬斃事可悲君不見竄  
李綱死宗澤可憐建紹同轍迹中興中興良可惜

冷山使 洪皓

冷山使者蘇武流仗節不畏敵人囚冷山八月雪成丈  
四月五月猶擅裘土人畏寒不敢出使者甘居十五秋  
戎王聚落不滿百土廬擅帳風蕭索採薪乞食教兒童  
嚼雪嚼氈籌漢策歸來館閣席未温一斤南荒九年謫  
天之報公何偏側君不見兩樞相一侍臣天之報公不  
在身



韓太師

黃袍飛著嘉王體閣門知事從龍起經筵侍講戲倡優  
 定策宗臣趙汝愚永州死諫司臺憲鷹犬多擊搏忠正收  
 讒阿何劉胡沈奮牙爪五十九賢投網羅北珠冠子高  
 一尺十四夫人分寵席行燈午夜鬧元宵京尹師明朝  
 轉恩澤地衣紅錦齊中堂真珠搭當生明光大臣排列  
 賀生旦進奏文移行四方太師權重專天眷邊釁胡為  
 起征戰威行宮省勢如山一日惡盈翻局面玉津園裏  
 悲風生日色慘慘天冥冥中軍統制權車轂密旨一語

加天刑殺韓侂胄天殺權姦天假手何事斲棺遠函首君王  
 不復三世讐地下權姦堪藉口

咸淳師相賈似道

咸淳師相專軍國堂吏館賓供羽翼諸司百職聽使令  
 臺諫承顏言路塞輪舟五日一入朝湖山佳處多逍遙  
 諛言佞語頌公德邊事軍聲聽寂寥半閑堂連多寶閣  
 歌姬舞妓相懽樂十年國勢盡傾摧猶謂師臣堪付託  
 師臣師臣躬督兵珠金沙頭鑼一聲十三萬人齊解甲  
 寡婦孤兒俱北行君不見黯淡溪流東復東木棉花開



生悲風師臣不忍馬革裹廁上有人能拉胸

從容堂詞

江萬里

朔風翻大江吹仆碧油幢  
懦將爭投款奸臣竊去邦  
從容堂上鬼節義獨成雙  
更有熊湘閣全家死不降

厓山行

三宮銜璧國步絕燭天炎火隨風滅  
間關海道續螢光  
力戰厓山猶一決  
午潮樂作兵合圍  
一字舟崩遂不支  
檣旗倒仆百官散  
十萬健兒浮血屍  
皇天不遺一塊肉  
一瓣香焚海舟覆  
猶有孤臣卧小樓  
南面從容就刑戮



玉笥集卷二

譚瑩玉生覆校

玉笥集卷三

元 張憲 撰

古樂府

古有所思行

我思古之人兮不可從乃在黃土之底青編之中青編  
 幾帙載名姓黃土萬冢埋英雄重泉黯黯隔白日宰木  
 颯颯生悲風我雖有言誰為通皇天不肯惜人物百年  
 轉眼如飄蓬秦皇漢武氣燄蓋一世彭殤邱跖俱成空  
 黃帝升鼎湖橋山葬遺弓虞舜死九疑鑾輿不還宮明



王聖主只如此紛紛二子直螻螳二女泣兮湘竹斑羣  
臣歸兮弓劍閒弔古昔兮望遠見江上之青山白玉擲  
黃金棺千年滯魄生辛酸功名震主亦閒事不若樽前  
且破顏

從軍行

從軍天目山走馬臨安道雖不著戰士鐵鎖袍亦載趙  
公渾脫帽金鼓震四野秋風吹三關將軍不尙殺士卒  
何時還白露下青草高樓多怨思杵聲空入夢誰解送  
征衣三軍糧食盡將士衣裘暖女且拾橡栗我欲醉絃  
管楚王挾纊越子投醪同功共事均苦分勞入參謀議  
出事弓馬黃石之言聽者蓋寡

雉子斑曲

雉子斑曲雙起錦膺繡頸斑爛尾十步一啄粟百步一  
飲水雌逐雄飛雄隨雌逝不願拘孿生甯求野鬪死野  
鷹昨夜下蒿藜擗雄飛去雌獨歸雉子斑忍分離辟邪  
伎作鼓吹悲

行路難

行路難前有黃河之水後有太行之山車聲宛轉羊腸



坂馬足踏蹬人頭關白日叫虎豹腥風啼狗狂拔劍顧  
四野使我摧心肝東歸既無家西去何時還行路難重  
咨嗟乞食淮陰市報仇博浪沙一劍不養身千金徒破  
家古來未際皆紛拏行路難多歧路馬援不受井蛙囚  
范增已被重瞳誤良禽擇木乃下棲不用漂流歎遲暮

擬招

以我美姝易彼紫駟裝刀頭兮飾箭廚西蕩秦隴東清  
荆吳擬立功於不朽任市人之擲揄客有忘君背國竊  
祿而活者亦何異食溷之鼠穴墓之狐厭見窮猿守株  
於岩野困鳥脫羅於江湖吾誠不能依阿偃仰以殉世  
仰皇穹而號呼若乃沐浴日光廓清天衢抑血誠憤發  
於所感又孰知強弱成敗之何如豪傑兮歸來吾與爾  
兮良圖

將進酒

酒如澗肉如陵趙婦鼓寶瑟秦妻彈銀箏歌兒舞女列  
滿庭珊瑚案玻璃鬢紫絲步障金雀屏客人在門主出  
迎蓮花玉杯雙手擎主人勸客客勿停十圍畫燭夜繼  
明但願千日醉不願一日醒世閒寵辱何足驚珠萬斛



金千巖來日大難君須行胡不飲此長命觥劉伯倫王  
無功醉鄉深處了平生英雄萬古瘞黃土惟有二子全  
其名

行行重行行

行行重行行此別何時還風霜阻道路歲月凋朱顏層  
冰剝肌肉半是刀箭瘢金印大如斗積功良亦艱君看  
霍去病終葬祁連山

白雪吟

白雪復白雪寡儔將奈何不如下里唱能使和者多繁

囂亂俗耳甯復知謬訛五絃斷南風咸韶隨逝波正聲  
久絕學舉世皆淫哇吾將復大雅盡掃蚊與蛙后夔今  
不在曲成誰爲歌

俠贈

趙客虎皮冠走馬章臺柳自小恥讀書吳鉤不離手干  
里殺讐家空中騰匕首俠累座上死羸政廷中走屠兒  
貪黃金狂生終掣肘丈夫難圖名合義死不朽安得蘭  
相如澠池一杯酒

房中思



紅象作小梳，髻龍盤漆髮。香泥禱守宮，染透桃花骨。白馬不歸來，倚牀弄紅拂。桂陰綠團團，坐對玲瓏月。

銅雀妓

陵樹日沈西，秋風石馬嘶。芳樽傾總帳，詎肯溼黃泥。慘慘笙歌合，遙遙望眼迷。玉人脆如草，能得幾回啼。

秋怨

雨聲繞山來，撼屋風獵獵。銀牀暑氣消，金井下梧葉。胭脂墮微淚，鸞鏡曉粧怯。香冷紅象梳，髻薄釵燕貼。明日玉闌干，槿花飛莫蝶。

天府告斗

黃巾騎馬騰紅雲，綠章細書天篆文。芙蓉小冠切白玉，伏地夜奏中天君。灼灼桃花映羊首，電繞魁罡百怪走。九皇一笑帝車移，銀鹿作耙霞注酒。玉衡閃爍招搖光，人閒塵土何茫茫。石家買得綠珠笑，五雲踏地椒壁香。短衣吹秋車，武子乾抱流螢照。書紙虛空喉舌正，司權杳杳冥冥注生死。

端午詞

榴花照鬢雲髻熱，蟬翼輕綃香疊雪。一丈戎葵倚繡窗，



雨足江南好時節五色靈錢傍午燒綵勝金花貼鼓腰  
段家橋下水如潮東船奪得西船標棹歌聲靜晚山綠  
萬鎰黃金一日銷

白苧舞詞

吳宮美人青犢刀自裁白苧製舞袍輕雲冉冉白勝雪  
激楚一曲回風高九雛鳳釵簪紫玉長裾窄腰蓮步促  
翩翩素袖啓朱櫻金籠鸚鵡飛來熟館娃樓閣搖春暉  
臺城少年醉忘歸琉璃窗綺戶鎖風色桃樹日長蝴蝶飛  
傾城獨立世希有罷吟綠水停楊柳急管繁絃莫苦催

真珠賸買烏程酒

桃花夢

美人夜出胭脂井骨碎香肌春不醒去年阿護不重來  
獨倚晨光照芳影彩雲紅雨兩無心覺來飛去三青禽

夜坐吟

蜻蜓頭落燈花黑瓦面寒蟾弄霜色玉壺水動漏聲乾  
夜冷蓮籌三十刻蓬頭兒子凍磨墨欲拾羈懷尋不得  
起看庭樹響風箏斗杓墮地天盤側

秋夢引



玉簪集卷三  
翠翹半暎雙飛鳳。輓轡金井懸銀甕。萬絲翠霧刷鵝光。  
兩點秋波和淚送。芙蓉帶露不忍折。鸚鵡隔籠時自哢。  
多情宋玉正悲秋。故放香魂入秋夢。

梁苑行

銀鱗靡靡天光晚。晝出梁王江上苑。脩眉凝睇秋波長。  
薄袖分香春麝暖。氤氳寶鼎騰水沉。寂歷宮門閉金鍵。  
三十六竿吹紫雲。露冷高臺雙鳳遠。

夏日吟

白日鑿鑿可礪齒。寒泉濯濯宜洗耳。六椽短屋雲下眠。

三日南風樹頭起。金刀薄切紅鱗鯉。玉樽細嚼松花螿。  
大星西下月如冰。明漢南來天似水。

楊花詞

東風吹春春不醒。桃花杏花空娉婷。萬絲剪綠暗如霧。  
千里相思長短亭。亭前女兒十六七。手挽柔條背春日。  
六街馬蹄踏黃塵。雪花漫天愁殺人。

食葵行

唳聲夜吠樊將軍。袖刃一擲神血噴。鴻門側盾撞衛士。  
怒叱項王如狗蹲。黃流一仰一斗吞。生啗兔肩何足論。



書生豪猛不減此燈下漆盤生劍痕

發白馬

朝發白馬津暮及陳留縣兵事急星火驛程疾雷電左  
挾弓右擎箭獨飛一騎報軍書百里王城馳急變丞相  
鎮靜材清談白羽扇天子蔽九重張樂絳霄殿內朝三  
日不得朝咫尺天威無路見三十萬眾解甲降錦繡封  
疆成廣薦明日腥風敵騎來背城借一誰堪戰壁倖竊  
魯弓姦諛賈紀獻銜壁牽羊事已非束手藩臣忘入援  
收淚踏邊塵含悲別宮院回首東南漢月高淅瀝風沙

破顏面白草黃雲望莫窮西樓尙隔湯成淀木葉山前  
下馬時青衣始悟降王賤使者來君不見

擇交難

擇交難結交易杯酒可歲寒一言相背棄金蘭膠漆照  
汗青夢魂雞黍通幽冥但慚未到張元伯莫謂人非范  
巨卿結交易擇交難擇交不慎生疑患方寸鬼門關對  
面九疑山險其心易其顏口蜜尙甘香腹劍已嶮岬人  
生慎勿輕交歡君結綬我彈冠結交未若擇交難結交  
結知已擇交慎其始嗚呼叔牙王佐今豈無安得鮑子



玉簪集卷三  
今爲我交夷吾

隴頭曲

策馬上隴坻。七日行不了。回首咸陽在井中。萬戶蒼蒼  
烟樹曉。隴月照黃沙。隴雲低芳草。朱顏綠鬢不建功。坐  
待星霜頭白早。持漢節。拂吳鉤。爲君生斫隗囂頭。誰能  
知李廣百戰不封侯。

出自薊北門行

出自薊北門。遙望瀚海隅。黃沙落寒雁。衰草號雄狐。河  
水血成冰。士冢碑當塗。乃知古戰場。本是賢王都。武皇

昔按劍。一怒萬骨枯。半夜下兵符。六郡皆謹呼。將軍各  
上馬。百道追匈奴。羊馬滿大野。萬帳收穹廬。英英長平  
侯。六騾走單于。至今青史上。猶壯武剛車。

北風行

北風吹胡沙。客上居庸關。山高落日黃。車重牛力殫。土  
岡隱顯際。百步聞鈴鸞。白馬流星來。上搭虎皮鞍。英英  
鞍上郎。髮拳雙頰丹。竹槽駕鞭箭。猿臂雕弓彎。連呼客  
避箭。箭出雙轅閒。客懼墮車下。伏地不敢看。徑前驅車  
去。可望不可攀。轉丐田野中。一飽祈生還。江南有少婦



王晉集卷三  
九  
閉閣畏風寒，便識北風寒。北風摧心肝。

擬邯鄲才人嫁爲廝養卒婦

妾家叢臺下，自小善鳴箏。十五面如月，不離保姆行。敵塵西北來，盜據邯鄲城。驅民出戰鬪，十戶九爲兵。五載不解甲，千里屍縱橫。司徒朔方至，賊勢始不撐。官軍下井陘，良家盡焚劫。掠爲廝養婦，哀怨何時徹。

吳鉤行

炭山燒天色如赭，神血噴人雙躍冶。紫鑰百鍊結松紋，三尺清冷掌中瀉。吳人作鉤鉤同形，吳王不知鉤有靈。鉤師向鉤呼鉤名，雙桴父胸飛應聲。百金懸賞金爲輕，吳人重鉤如連城。吳鴻扈稽雙厲鬼，價重連城精莫比。不殺句踐雪遺恥，誤人亦似夫人七。

採蓮曲

明月滿大堤，盪舟湖水西。槳牙鳴浪碎，船尾拂花低。綠鬟溼香霧，紅袖漬香泥。採蓮不得藕，空妬鴛鴦棲。

空城雀

嗷嗷空城雀，一飽啄餘場。不比珍奇鳥，自矜毛羽光。翹首仰喂飼，巧語如笙簧。幽棲樊籠裏，黃口不得將。



一鞘詞

一鞘容兩刀。古人恥不佩。一牝聚三雄。君子忍爲配。株林從夏南。遺臭穢千古。惟聞褚彥回。不污宋公主。

當壚曲擬梁簡文帝

初八月上弦。十五月正圓。當壚設夜酒。客有黃金錢。懽濃易得曉。別遠動經年。相送大堤上。舉杯良可憐。

薄命妾

少長深閨裏。面不識風吹。自爲薄情婦。懶塗紅玉脂。花軒背春睡。月榭惱秋思。不嫁張京兆。敢煩郎畫眉。

猛將吟擬孟郊

手捽敵人頭。臨陣試劍術。氣酣乳虎怒。拳捷秋鷹疾。鏖戰每在前。上功當第一。江南未嘗見。自古山西出。

刺客行

刺客膽激烈。見義卽內熱。每聞不平事。怒髮目眦裂。方剔奸相喉。又斷佞臣舌。試看腰下劍。常有未凝血。

胡姬年十五擬劉越石

胡姬年十五。芍藥正含葩。何處相逢好。并州賣酒家。面開春月滿。眉抹遠山斜。一笑能相許。何須羅扇遮。



春晝遲

樓觀參差半空起。縹緲闌干烟霧裏。綠萍一道浸鴛鴦。  
笑聲只隔桃花水。柳下粉牆斜靠街。當晝紅門半扇開。  
遊絲冉冉掛簷角。燕子一雙何處來。

江南弄

菱尾蒲芽水新足。沙暖小桃紅夾竹。誰家燕燕倦東風。  
戢翼畫梁春睡熟。螭頭舫子載醯醢。勿惜千金買詞曲。  
明朝風雨蔽九川。千里江南芳樹綠。

日出入行

東邊日出羣動作。蠢蠢營營異憂樂。須臾力倦各暫甯。  
日光亦向西邊落。枕衾未暖夢未成。金雞一聲扶桑明。  
孜孜爲善尙不及。何暇欲存身後名。

哀亡國

買桑餒蠶絲不多。鑿注種藕蓮幾何。廣陵夜月瑤花宴。  
結綺春風玉樹歌。君不見黑頭江令承恩早。白髮蕭娘  
情未了。狎語淫人夢不醒。宮城綠遍王孫草。昏昏黃霧  
塞宮門。白練寒生玉頸痕。錦繡江山春似畫。幾傷風雨  
弔迷魂。



玉簪集卷三  
三  
瑤池曲

曼倩啼饑桃未熟綺窗珠樹層陰綠上清童子晝臨關  
鸞尾掃雲方種玉芙蓉畫闌春晝長簫韶一派起回廊  
八龍未暇送周穆三鳥遽能迎漢皇風雨蒼蒼隔元圃  
不勞西望祠王母贈君桃核大如杯歸植茂陵陵上土

歸來曲

芍藥薔薇向春泣湖上春風政無力綠塵滿街馬跡多  
良人未歸將奈何娟娟脩娥久凝佇阿侯如今在何處  
錦箏撥斷十四絃絃聲清苦愁不眠粉香翠黛凝芳筵

襄陽白銅鞮曲

襄陽白銅鞮下踏揚州郭可憐揚州兒棄戈甘面縛大  
堤女兒何命薄青年坐失榮華樂蕩子功成未肯歸閉  
門三月楊花落

楊白花

楊白花何輕薄隨風渡江去飛向誰家落江南風雨春  
先老陌上悠揚爲誰好永巷春歸夢不成綠池一夜浮  
萍生

車遙遙



王魯集卷三  
車遙遙推向何處去。勸君勿輕行。前途有泥淤。勸君君  
不留銳意。作遠遊。前有伏路者。勇力能挾輶。挾君輶。劫  
君財。夕陽衰草暴君骸。君魂有靈招不來。

俠士吟

俠士有時有。不平無日無。安得匕首劍。贈與軹井屠。刺  
殺韓王相。報仇嚴大夫。俠士死傷勇。亦勝懦夫活。許身  
然諾閒。不爲勢利奪。瑕瑜兩不掩。意氣足相埒。俠士赫  
赫聲。懦夫厭厭生。懦夫視死重。俠士視生輕。我吟俠士  
詩。俠士爲我起。斷却權奸頭。少雪懦夫恥。君不見臨安

軍士彼何人。能斫申王鐵輿子。

寒女嘆

楚楚寒家女。老大在閨房。空懷標梅嘆。對鏡悲春陽。豈  
無媒妁言。配彼多金郎。竊念豈容易。欲嫁不復行。坐使  
窈窕容。綠鬢成秋霜。甯爲未嫁女。莫作失節孀。

征婦嘆

日暮鼓鼙急。呼聲如雷闐。漢兵三十萬。夜戰胭脂山。風  
皺皮肉疽。血染車輪殷。技窮下馬鬪。矢盡張空拳。夫君  
暴骸骨。妾正摧心肝。豈無膏沐容。粧艷不成懽。亦有琴



王晉集卷三  
瑟絃音好誰與彈枕痕掩淚迹鏡影緘愁顏高堂舅姑  
老聊復強加飧

靜女吟

豔女羅綺裳靜女荆布粧豔女嫁大將靜女歸農莊大  
將死邊疆豔女愁空房農莊務耕作靜女勤筐筐豔女  
迭三嫁末路流爲娼靜女教子成五福垂高堂好花空  
窈窕桃李不如桑

昭君怨

四絃嘈嘈彈北風胡馬嘶回頭望漢月遙落長安西白  
草沒行路萬里春淒迷誰謂秭歸女去作單于妻枚淚  
入穹廬顰眉向羊酪敢恨君恩輕惟憐妾命薄嫁女媚  
夷狄良爲中國羞謀臣自無策畫史不須尤

秦臺曲

層臺五百尺下瞰長安中人言秦王女學仙此成功弄  
玉跨彩鳳蕭史騎赤龍雙吹紫簫去千載永無蹤惟留  
鴛鴦夢萬枕魘愚蒙

神絃十一曲

朝行青溪曲暮宿青岩阿女蘿施長松白蘋依綠荷神



來水風生神去水無波朝雲不為雨夕露將如何右宿阿

古皇上帝高無語十二天門守金虎道君飛下玉清來

獨與蒼生作宗主奈何人事多覩縷閣阜號赤狐玉泉

飛白鼠武夷失左肩羅浮虧右股東明海波高拍天幽

魂滯魄稱神仙腥風剝面晦白日老蛟頑蜃垂饒涎道

君道力通上元天篆印文紅玉鐫七星劍光上掩斗五

嶽小冠騰紫烟飛雷走電搖山川巍巍正位專天權叱

咤百神如轉圜賢哉道君胡得焉嗟哉道君胡得焉右道君

雙頭牡丹大如斗簇金小帽銀花鏤綠鬪長眉丹激唇

白馬黃衫灌江口平頭奴子金絲髮六尺竹弓開滿月

神葵帖尾卧牀前頑蛟尙染刀鏝血靈風颯颯石犀吼

吳船楚舵紛搔首紅雲忽報七聖來蜀波水色濃於酒

右聖郎

四十九鞭馬箠合眼旋風馬頭起曲項琵琶金帖槽

七寶銀瓶勸金醴紅斑碎纈石榴裙弓尖絳縹飛輕塵

雙鬢髮髻好容色十步回頭九媚人舌尖若血噴紅雨

偏剝有聲微扣齒絲衣零亂野花枝頓地神狐拖九尾



右嬌  
女

石郎家住南山裏夜叱卧羊成隊起  
研光羅帽舞山香  
金礦銀坑爛如紙竹節短鞭赤狐山  
精水魅聲嗚嗚  
回風踢水過溪曲旋折山花聘小姑

右白  
石郎

香爐盤盤青霧起靈帷撒動金錢紙  
練帶斜垂八尺冰  
纏項白蛇神色死青溪小姑雙露乳  
起著神衫代神語  
花裙繡袴踢旋風雙袖翻飛小蠻舞  
西山日落雲冥冥  
金龍畫燭燈光青土妖木魅作人立  
古壁空廊聞履聲  
繁絃嘈雜社鼓吼體挂羊腸磔牛首  
扶神上馬送神歸

老狐醉卧簷前柳

右青溪  
小姑

洞庭八月明月寒湖龍捧出玻璃盤  
湖風忽來浪如山  
銀城雪屋相飛翻白鼉樹尾月中泣  
倒捲君山輕一粒  
浪花拍碎回仙樓萬斛龍驤半天立  
兩師騎羊轟畫雷  
紅旗照波水路開青娥鬢髮紅藍腮  
紫絲絡頭垂黃能  
神絃調急龍姑來

右湖  
龍姑

西溪日落星離離龍姑廟下號狐狸  
東家少婦呼小姨  
紙錢香奩左右提紅甘紫嫩栗與梨  
畫羅小扇相分攜  
吹燈照道溪之溜古祠深深溪岸陡  
熒熒鬼火紅窠走



履聲襲人不敢啼小姨堅持少婦手心香一瓣謝姑恩

鸞刀自斫烏羊首

右姑恩

兩兩白玉童採菱湖淥中一雙木蘭棹飛臂破南風雁

頭刺帶綠茵菖花房紅折來神女廟進入湘妃宮豈欲

偶奇遇願然神惠終

右採菱童

皇皇明下福祿是臻熿熿靈童按舞殿殿管蕭炳煥元

氣氤氳盤屈以下墜神昭回而上伸

右明下童

枝葉同生根株異歸萬物脩短靡不乖違於惟靈祇順  
庇咸宜穆穆一德雍雍百禧雷霆以鼓之風雨以舞之

俾爾生無阻兮俾爾歸有所兮

右同生

拂舞詞五章

翩翩白鳧集我堂下悠悠江湖邈焉得所白鳧之白皎

如雪霜金堂高明君惠無疆葑湖下開白鳧飛來青蓋

黃旗入洛何時雕鴟食人剝面殘肌白鳧飛來吾與女

兮忘機

右白鳧

躋躋踰躄舞鳳飛凰童子不孤寡婦不孀聖人在上萬

物斯觀五日一風十日一雨成湯祝網大禹下車載道

賡歌盈庭都兪猛虎不食仁厚如騶虞兕歸各斂衽干



羽束籛條懷哉堯舜世千古共嗟吁右濟

獨漉獨漉水高沒屋沒屋尙得水高何即野鷹西來摩

天高飛我欲射之氣衰力疲桃牀泛泛東流西陷嗟我

伶俚與之同憾牀深幃低對影獨棲如有遠志勿念繡

閨吳刀夜鳴長弓在發父死不報何用勞勞申胥復楚

魯連却秦一言定事彼獨何人右獨

碣石沒海水淪湮無已時望之小如拳鼇冠露玉筍海

波揚黃塵碣石乃還故雖復高際天半已成灰土靈龜

固云壽豈與天地久騰蛇縱有神頑鱗終亦朽朱顏能

幾何轉眼成老醜胡不廣作懽日夜飲醇酒右碣石

秋風下桐葉輓轡動金井美人汲寒漿銀瓶垂素綆綠

莖掃晴空洗靜青天影淮王尊有酒箕踞事酩酊撫手

作悲歌徘徊顧光景八公門首待滄洲路非永丹成劈

空去血劍全首領文成八卦背秀聚三花頂逍遙太清

中龍虎遞馳騁全勝茂陵郎銅盤花露冷終然三泉下

玉匣蔽幽境右淮

秋來

雨聲連夜捲江水霹靂破車騰赤鯉寒梢露翠劈空飛



王晉卿卷三  
壓地黑龍扶不起大山搖搖小山崩黃能夜吐雹如冰  
天宮鬼箭自空注下射行人攢刺蝟六丁長爪攪明河  
扛起虹橋翻玉波陽烏白頭朱雀叫電蛇閃爍天孫笑  
曇雲藹藹白帝來銀旗玉甲光明開拳毛老虎排天門  
颼颼涼氣吹黃昏袂羅小衫裁嫩綠金翦高堂對明燭  
深沉鳳帳寂無聲一夜輕涼新睡足明朝織女會牽牛  
更上西家乞巧樓

江南謝二首

江南謝今何在生綠畫羅屏春光不相待藕莖拗折蓮

絲長千尺春愁不可量

江南謝春風隔長夜柏枝亭下水連空口捲銀瓶向身  
瀉綠雲分得香囊麝夢裏如今頻見畫欲煩神嫗寄箜  
篌箜篌未彈先淚流

卿卿曲

煮蠶繅絲頭緒多出門上馬歧路差卿卿不磨奈卿何  
君道曲

大君若天道廣運無不周明視並日月生殺成春秋疆  
場盡兩極聲教被九州丞相任股肱尙書總襟喉雷霆



出號令前宿分諸侯沈潛出陽剛高明破陰柔乾健不  
少息兢業毋自偷以此守神器堅固如金甌

天狼謠

煌煌天狼星芒角射參昴獨步天東南熒熒竟昏曉天  
弧不上弦金虎斂牙爪萬里食行人白骨遍荒草火熱  
烏龍岡血染朱雀航列宿不盡力五緯分乖張戍客困  
疆場荷戈涕成行誰爲補天手爲洗日重光

雙燕辭

雙燕復雙燕雙飛繡戶中梅梁立春雨桂殿別秋風火  
焚柏梁臺信斷烏衣國羈雌憶孤雄雙飛難再得卵破  
巢旣空繫絲徒爾紅曾如燕赤鳳能入漢皇宮

綠水謠

今宵何處月南浦木蘭船半夜涼風起荷花如錦鮮莫  
翦葦上葉水珠有時圓且留泥下藕要使根株連鴛鴦  
不並翅好事琉璃脆解佩擲真珠少酬交甫意

君馬篇

君馬獅子花臣馬照夜白君著紫澹褕臣著金蔽膝天  
高風勁弓力強一鞭飛過黃茅岡豐狐狡兔少顏色元



熊文豹走且僵君燃箭臣臂鎗馬上各垂雙白狼歸來  
解鞍坐對飲一百觴劍尖啗肉臂作俎醉卧不知更漏  
長

子夜吳聲四時歌四首

朱雀街頭雨烏衣巷口風飛來雙燕子不入景陽宮為  
問秦淮女還知玉樹空  
湖上水雲綠荷花十里香咿啞木蘭棹驚起睡鴛鴦雌  
雄兩分去不覺斷人腸  
白苧鴉頭襪紅綾錦鞞靴玉堦零露冷羞折鳳仙花去

去蕩遊子秋深不念家

瓦上松雪落燈前夜有聲起持白玉尺呵手製吳綾穩  
紉征袍縫邊庭草又青

莫種樹

莫種樹種樹枝葉多枯楊易生稊鈍斧難伐柯秋風動  
悲思春月夜如何

估客二首

發舟石頭城繫舟梅根渚江月夜寥寥照見家人語  
割裳製家書刺指題日月不知何時到但見今朝發



史童兒曲

君騎汗血駱兒卧紫絲幙杜鵑滿空山君行何時還

阿母祠

阿母似麻姑十指如鳥爪先彼日月生後于天地老

高句驪

魚鼈走朱蒙夫余王氣終金花紫羅帽長袖舞遼東

塘上行擬甄后

白露下塘蒲芙蓉秋露溼不忍生別離時抱蒹葭泣

芙蓉花一首三解

芙蓉花大如杯露爲醴玉作臺勸客飲客勿推 芙蓉  
花嬌殺人紅爲袖綠爲裙舞回風歌停雲勸客飲客須  
醺 芙蓉花何娉婷舞嬌堂上燕歌響花閒鶯子高未  
合香曼卿先寄聲人間永夜秋風冷莫說韓娥絲竹亭

丁督護曲一首五解

丁督護北征去衰草沒戰場郎尸在何處 丁督護勿  
回顧千里馬蹄塵遙遙盟津渡 丁督護寶刀鞍上據  
百戰無前敵收功洛陽路 丁督護冬窮歲云暮相送  
落星墟哀情向誰訴 丁督護白楊響墟墓馬革易成



泥郎尸今暴露

段兒歌

玉童澆澆兩髻墜雙瞳射人秋水媚情濃意遠風骨異  
微笑向人書段字花覆古城心欲醉地遠如今空有淚  
春風淡沲東北來綠雲隔春眉不開郎眉雖不開未比  
兒心哀紫絲竹鞭玉腕馬踏破花城何日回

紅門曲

紅門欲開人漸稀棲鳥啞啞漫天飛西宮寶燭明如晝  
玉筵圍坐諸嬪妃黃羊夜剝博兒赤金椀銀鑰進魚炙

銀漢依微白玉橋隔花宮漏夜迢迢內城馬嘶丞相朝

和睦州雜詩十四首

五將開新府三軍解沸湯將軍驅土鬼部曲散夫娘右大

將令

白牙山水如湯烏龍嶺頭日無光五龍墜地化作狗

怒目嚙人烏喙長右白牙

閒花竹竿三丈長紅皮縵笠繡衣裳石榴花曲唱得好

爭奈吳娘不斷腸右石榴花

十月四日天沙黃虎狼西來將軍亡帳前殘倖屍骸僵



君不見崔杼鋒刃三尺長晏嬰民望那可傷

右黃沙行

孤城新築十丈高五狼西來成夜噪將軍夜別美人去

軟玉不禁朱粲糟

右孤城

城土未乾城主改長旗夜入黃巢怨禽飛來遠砦啼

不學精衛填東海

右怨禽

鳳鳴不向阿閣巢網羅畢張將焉逃此身尙不免鼎俎

豈問摧殘五色毛

右鳳鳥

睦州女兒嬌如花閨門不出愁風沙今朝忽遇沙吒利

白馬馱入何人家

右睦州女兒

婦人在軍鼓不揚軍中豈宜安女郎鄭旦西施齊入水

將軍真有鐵心腸

右旦施

西王孫女嫁東郎不學虞姬就劍芒忍懷遺腹事仇主

不見胡法生兒洗滌腸

右西王孫

南國香誰家女容貌如花絕代嫩嫁郎西去久不歸今

日相逢在軍壘宮粧不著嫁衣裳三尺罽罽包髻子

右南

國香

相如全璧目眦裂劍指秦王衣濺血衣濺血不比儀秦

爭口舌

右壯士行



秦王雄飛六王伏六王戰敗疆土感英雄獨有朱屠兒  
袖隱金椎入函谷圈中饑虎思人肉屠兒入圈虎閉目

右壯士行

義鵲子雙翼長獨入雁羣擒雁王不比饑鷹肉飽思飛

颺君不見公孫子陽墜馬洞曾死七尺虎軀橫戰場右義

子鵲

睦州相杵歌六解

韓公西築受降城吐蕃不來城下行將軍築城城未了  
隔城聽得打城聲 築城築城忙築城敵人去城不十

程雲梯火炮製作巧中有魯般能用兵 搬土築城民

力多晝夜不息如擲梭黃梅雨來江水漲城脚不牢將

奈何 蒸土築城不須高買石甃城不須牢城中一旦

化為敵十萬天兵先敗績 一月築城城漸高將軍心

喜民力勞將軍須與城俱碎一寸城土皆民膏 金城

峩峩高際天湯池泱泱洪若淵堅深自古說統萬猶有

敵人擒赫連

三忠詞

精衛苦精衛苦口銜木石填水府水府若地平精衛作



人語海鯨三頭共一尾挾潮作兮挾瀾上吞舟殺人如  
殺螳豈無傷弓禽不學精衛死精衛溺死不足恤填海  
不乾誓願不肯畢長鯨悔罪海甯謚精衛雖死功第一

右精衛

戰銅城死湖水父忠臣兒孝子淮南烽火吹邊塵淮南  
將帥逃如麇秋高覽鏡思血戰誓死不作偷生臣麾白  
羽接短兵有進死無退生騎可陷身可殺忠魂義氣無  
時歇銅城不平血不滅

右戰銅城

蚺磧在湖北蚺原在湖南神蛟誓擊蚺首碎螂蛆不思

蚺味甘蚺類多蛟力少盡力搏蚺蚺不了螂蛆一旦化  
爲蚺肆毒毒蛟蛟潰腦神蛟死蚺當途雷聲爲我行天

誅右蚺磧

### 富陽行

搖首上馬金鞭揮山頭白旗如鳥飛西來萬騎密蜂蟻  
四面鼓聲齊合圍金城木柵大如斗五百貔貅誇善守  
鐵關不啓火筒焦力屈花穉皆自走城南城北血成窪  
十里火雲飛火鴉將軍豪飲不追殺掠盡野民三百家

### 鐵礮行



三言集卷三  
黑龍墮卵大如斗卵破龍飛雷鬼走先騰陽燧電火紅  
霹靂一聲混沌剖山河傾不擊妖孽空作聲天威褻瀆  
人不驚

燭龍行

燭龍燭龍女居陰山之陰大漠之野視爲晝瞑爲夜吸  
爲冬噓爲夏虵身人面髮如赭銜珠吐光照天下天地  
寬日月小烏兔盤旋行不了窮陰極漠無昏曉女代天  
光補天眇女乃不知日被黑子遮月爲妖蠹食五緯無  
精光萬象盡奪色下民媵莖皆昏惑燭龍燭龍代五職

胡不張爾鬣奮爾翼磨牙礪爪起圖南遍吐神光照南  
極補缺免無損傷正畸烏不傾昃妖蠹黑子紛誅殛重  
光重輪開萬國胡爲藏頭縮尾窮陰北坐視乾坤黯然  
黑乾坤若崩摧吾恐女龍有神無處匿

白翎雀

真人一統開正朔馬上鞞轡手親作教坊國手頌德閭  
傳得開基太平樂檀槽鈇鈇鳳凰齧十四銀鑲挂冰索  
摩訶不作兜勒聲聽奏筵前白翎雀霜醺醺風殼殼白  
草黃雲日色薄玲瓏碎玉九天來亂散冰花洒氈幕玉



玉筍集卷三  
翎琤珰起盤礴左旋右折入寥廓峯律孤高繞羊角啾  
啾百鳥紛參錯須臾力倦忽下躍萬點寒星墜叢薄碧  
然一聲震龍撥一十四絃暗一抹鴛鴦飛起暮雲平鷲  
鳥東來海天闊黃羊之尾文豹胎玉液淋漓萬壽杯九  
龍殿高紫帳暖踏歌聲裏懽如雷白翎雀樂極哀節婦  
死忠臣摧八十一年生草萊鼎湖龍去何時回

傷魂啼血行二首

孤城四面啼猛虎怒豹咆哮餓彪舞東海王公長獵兒  
手有長刀腰有弩王公前日爲虎吞膽落獵兒深閉門

今晨馮婦復攘臂虎視不動門邊蹲君不見妖狐假威  
不敢搏而況真虎據岩壑傷魂導虎何已時血腥荒草  
愁離離

白面於菟行偃草雄劍爲牙戟爲爪夜越鐵關吞九牛  
弱婦嬰兒眼中飽郊原十里吹腥風白骨塞途秋草紅  
肝腸掛樹野鴉噪鬼火照城人跡空嗚呼獵師心力巧  
藥箭無功機發早舊魂走抱新魂啼一夜黑風天亦老

次韻壯士歌

春來塞草青秋來塞草黃草黃馬肥弓力勁邊聲徹夜



王等集卷三  
三五  
交鋒芒鋒芒直上燭霄漢壯士目炬與之相短長王師  
十年厭追逐朱粲黃巢食人肉天津誰弔吳卿痛秦庭  
孰舉包胥哭壯士怒翻海百川皆可西巍巍鸞鳳闕肯  
使鴟鴞棲漫漫長夜久未旦一聲啼白須雄雞君不見  
淮陰胯夫餓不死一劍成名有如此斬蛇未覩隆準公  
沐猴甯數重瞳子

孟城吟

孟城如斗復如鐵百萬天兵半魚髓狼星燭地響晴雷  
白馬將軍夜流血匣中寶劍寒生雷一擊能令太山缺

怒提往斷落星石獻與師臣補天裂

生別離

有鳥有鳥桓之山一乳四雛長羽翰一朝棄母絕四海  
母啼不絕聲悲酸聲悲酸摧心肝生別離死別難南隣  
健兒戍渤海東家壯子征函關賣田買寶刀賣牛裝馬  
鞍父母墮苦淚弟妹增離顏呱呱子乳獨慘慘妻啼單  
出關道路遠匹馬鏖戰難百見月魄死十度霜華寒霜  
華寒月魄死悠悠歲月何時已主將不尙謀士卒欲誰  
倚英雄務割據盜賊何由弭白骨積成山仆地如螻蟻



三言集卷三  
普天事征戰荷戈動逾紀烽火入中原千村不一存初  
聞父母訃繼傳家鄉焚有喪不敢奔有苦誰與論生別  
離聞者猶銷魂死別離痛極聲復吞人生慎勿輕從軍  
桓山鳥啼聞不聞

殺氣不在邊

殺氣不在邊凜然起比鄰隔城聞叫喧白日飛黃塵春  
雨夜鬼哭青燈火燐燐豈無籌邊臣百駝馱金銀亦有  
館閣賓紅粟盈倉困佞語喜見色直辭怒生嗔兵強不  
出戰師老志何伸

怯薛行

怯薛兒郎年十八手中弓箭無虛發黃昏偷出齊化門  
大王莊前行劫奪通州到城四十里飛馬歸來門未啟  
平明立在白玉墀上直不曾違寸晷兩廂巡警不敢疑  
留守親姪尙書兒官軍但追上馬賊星夜又差都指揮  
都指揮宜少止不用移文捕新李賊魁近在王城裏

賦得關山月送速博安卿

少室青連雲虎牢峻削鐵茫茫雒陽道寒月正淒切遊  
子悲故鄉西望淚嗚咽豈不念早歸兵火久隔絕山高



月輪小關險車輪鏃虎豹起食人狐狸坐憑穴枯草白  
零露陰風青燐血跣足晝十程鶉衣冬百結弱子面削  
瓜老妻頭覆雪紀綱無力人十進五復輟似聞鄉里雄  
百萬總旄鉞王師雖戰勝妖孽未盡滅攘臂起作勢欲  
歸備行列徒存壯士心奈此筋力別人固有老少月亦  
有圓缺月魄死復生精神老衰竭關塞遠且長歸心中  
道折六親不易見萬古憑誰說誦爾北征詩知爾中腸  
熱念爾行路難贈爾關山月

白頭母次徐孟岳韻

道旁哀哀白頭母西馬塍上花翁婦數莖短髮不勝簪  
百結鶉衣常露股自言夫本業種樹一朝棄業從戎伍  
荷戈南征竟不歸不知被殺還被虜屈指十年音信斷  
獨宿孤房誰共語家在錢塘古蕩東門前正壓官橋路  
恰憶夫在種花時春來桃李下成蹊自從夫死花樹折  
錦繡園林成馬埒縱餘梨杏與梅茶無力入城供富家  
富家遭兵亦銷歇金錢誰復收名花何況邇來新將相  
一體好儉不好奢兵餘城市化村塢亂後名園作軍府  
年年寒食杜鵑啼人家上冢西湖西時光荏苒易飄忽



王晉集卷三  
三  
可憐誰拾花翁骨君不見海棠風楊柳雨牢落錦紋箏  
凋零金雁柱黃四娘家客漸稀蛺蝶飛來過牆去

激海洋書海盜錄後

海漫漫颶風拍浪高如山盜長踞坐大樓船手劍三尺  
神思何安閑淮樞官見之心膽寒膠州龍公空授徑寸  
珠耳環盜長乃爲天除奸不用大呼天可汗天可汗刑  
已失吾非利若財抵跪何足恤失土民真罪人女命雖  
螻蟻吾禮有主臣穴胷取心賽海神淫怒殺人天乃噴  
激海洋闊無垠過者不用多金銀重裝往往能殺身

主家貓

主家畜雄貓文采玳瑁光晨滄溪魚飽午睡花陰涼營  
營溝中鼠白日登我牀鼠東貓却西所恨不相當一朝  
忽相當反爲鼠所戕淋漓兩昏疽跼促四足僵呼奴起  
擊鼠鼠去貓倉惶作炊寶貓腹割裳裏貓瘡愛貓心雖  
仁敗事流毒長所媿主家闇貓驚庸何傷

塗山渡河女

公無渡河公渡河公自取死死奈何女無渡河女渡河  
後有白刃前白波上無橋與梁下無舟與槎渡河女甯



王晉集卷三  
死河水不死賊戈死戈比節婦死水齊孝娥所以塗山  
女受死不受辱勿使賊刃斫妾頸甯使河水爛妾肉篋  
篋有聲如麗玉

琴操

干戈不息殆且十年余流連江湖閒幽憂憤  
奮不見中興滙際四方又無重耳小白之舉  
思欲終老深山大澤中且所不忍將欲仗劍軍門  
而可依者何在作琴操十二以寄意焉俾能琴者  
尋聲而鼓之余倚歌而和之  
或者可以少泄於梗梗云

灑水東奔兮澗水攸同禾黍離離兮薺麥蓬蓬周召不  
作兮桓文告終王目以公兮雅降為風嗚呼平既自夷  
兮赧甯得不窮

右閔  
周操

秋草兮芊芊黃金臺兮夷為淵悵廣宇兮裂瓦望離宮

兮生烟淚可盡兮目可穿思昭王兮不可言

右懷  
燕操

帝庭淵淵玉京雄兮憶我壯年竊觀光兮夔龍在朝天

下文明兮既盛則衰喻炎涼兮耄期倦勤禍亂之秋兮

通都大邑天實荒之織畚販繪天實昌之天自作孽俾

我不能生兮

右觀  
光操

茫茫禹蹟兮畫為九州侯伯牧守兮職貢是脩女或不

臣兮天討罔偷夫胡今世兮敵國同舟嗚呼哀哉兮吾

誰與謀

右禹  
蹟操



聲裂裂兮揚沙騰飈雲冥冥兮雷蒸怒潮雨澤不降兮  
倏虹滅而電銷不擊妖孽兮不潤枯焦天威自褻兮怒  
曾不崇朝右風  
雷操

日薄西山兮沴氣交羅魑魅迭作兮狐狸嘯歌方當陽  
於中天兮四海融和忽出路以晦墜兮光景蹉跎末虞  
淵兮浴咸池乘六龍兮挾以馳世無其人兮奈日何其

右西  
日操高山巍巍兮危峯際天蟠據厚土兮根入重淵草木不  
遂兮赭如血鮮礲不可薪兮瘠又不可以田徒載祀典

兮配岳與川不雨不雪兮民何望焉右高  
山操

渭水瀰瀰兮函谷嶙峋我馬西逝兮意將涉秦父母止  
我兮子宜愛身子毋遽西兮秦其有人右涉  
秦操

漳之水幽幽其色望魏陵兮悽然心惻美人化土兮銅  
駝荆棘徘徊涕泗兮弔孟德翦羣雄兮建皇極何中道  
兮變鬼蜮爾後人兮鑒失得毋披猖兮恃強力甘惡名  
兮稱漢賊右望  
陵操

春江兮潺潺目浩浩兮烟瀾水浪浪以激石日汨汨而  
含山忽中流之白叟楫芳桂兮舟木蘭渺浮羽以輕舉



坦千里兮忘還豈余心之不能梗王室之未安右春江操

大田蕩蕩時雨施之東作既興耜耨菑之黍稌穰穰歲

計資之嗟我驅馳寒饑載途豈不懷耕歸守弊廬民亦

有言田實禍余右懷耕操

屈吾指兮計吾壽指白日兮怨清晝惜芳年兮不吾幼

蟪蛄兮春秋長無窮兮宇宙右惜逝操

被薜荔兮帶女蘿乘赤豹兮變現多手擲揄兮足趨跳

夜吹燈兮晝長嘯為鬼為物兮我不知察爾情狀兮識

者誰右山鬼操

朔風起兮天地昏冥寒氣結兮河水成冰舟楫不行兮

車騎憑陵狐兮狐兮身且輕狐猶疑兮側耳聽右狐分操

我有巢兮手自為之朝朝暮暮兮飛銜樹枝精神疲勞

兮爰托我私女何為者兮心實嶮巖據我所兮使我朝

不得食而暮無所歸鳳凰莫訴兮余心孔悲右鳥失巢操

萬木號風兮振山阿垂舌舐掌兮刀劍磨豐狐狡兔兮

女食自多虎乃傷人兮奈女何右山君操

有犬狺狺兮相雄其聲努目研研兮復獐其形匪盜是

求兮主心靡甯牢可食兮竇可經犬毋咋骨兮汚主人



之庭右昨  
骨操

飛鳶兮徐徐翔而集兮汚渠幸一飽兮腐鼠遽仰嚇兮  
天衢醴泉可飲兮竹實可茹鳶毋鳳嫉兮鳳食有餘嚇右

腐  
操

春江東流懷我舊隱萬岡層來一溪橫引碧漣漪以生  
瀾綠衡從兮分眇修竹映戶茂樹覆楯枝纂纂兮秋實  
林煒煒兮春筍羹魴鯉兮梁有筍廚雉兔兮講有隼奕  
清晝兮文楸鼓良宵兮玉軫顧晏安兮是湛忽垂兕兮  
荆蠶抑天意之玉成降孤臣以疾疢復吾故兮允難悵

忘歸兮安忍右懷舊  
隱操

和趙子固平章水仙二操

蹇予步兮南浦水落落兮石魯魯望漢江兮心獨苦擲  
珠結兮贈交甫右解  
佩操

整予駕兮洛食水瀾瀾兮石泐泐望成皋兮目無極緬  
朱絲兮待曹植右鼓  
琴操

賦松隱二操

彼髯叟兮幽獨避秦爵兮如避辱甘霜雪兮在空谷牽  
女蘿兮補茅屋右牽  
蘿操



彼髯叟兮幽貞蹇吾形兮全吾壽齡鬱歲寒兮青青抱  
長鏡兮采茯苓右採  
苓操

泰寓操

方寸微兮且大圓形不鑿兮七竅全天光發兮日月內  
旋我在其中兮以樂吾天

玉筍集卷三

譚瑩玉生覆校

48-12791



